

■ ORD LA VITA DA LUDMILLA CAHENZLI

Manderinas svaneschan

Avant duas emnas èsi capità per l'emprima giada. Jau vegn a chasa, mett en cuschina las cumissiuns e vom dabet sin tualetta. Cura ch'jau turn en cuschina hai sin maisa in mantun paletschas da manderinas. Jau vom immediat en chombra dals uffants: «Tgi ha mangià las manderinas?!» Mes uffants ma guardan sco sch'els na savessan betg ch'i exista in tal fritg.

L'emna passada hai gè ina acziun da manderinas en stizun. Jau cumpr gist in entir harass. A chasa dost jau immediat il harass en spensa e cuvrel el cun ina gassetta. Jau mon a pren-

der las autras cumissiuns or da l'auto e cura ch'jau turn ma dumonda la figlia pitschna: «Ti mamma daco hai be paletschas en quest harass en spensa?» Jau sbrig en spensa. Incredibel. Jau curr en chombra: «Tgi ha mangià tut questas manderinas!» «Jau betg», di la gronda. «Jau er betg», fa il mesaun.

Las duas fatschas èn uschè innocentas ch'ins po nunpusaivel s'imaginar ch'ils butretgs che tutgan tar questas fatschas van bunamain surora da spir manderinas.

Stersas èsi stà anc mender. Jau turn a chasa, tschent dus

netz manderinas sin maisa, ma volv be svelto per dustar la bursa en il truclet ed ina mesa secunda pli tard èn ils dus netz gia stgarpads e las paletschas da manderinas starnidas dapertut enturn. Ils trais uffants che sesan en davos maisa guardan a mi tut agraden e la pitschna respunda senza ch'jau avess dumandà insatge. «Jau betg.»

Ma oz sun jau vegnida davos en cun las manderinas. Jau hai tegnì ellas ferm sut bratsch. Jau avev extra laschà pachetar ellas en plastic, per che mes uffants – che fredan manderinas sin kilometers – na

sentian betg ellas. Da bass sun jau schluitada en cuschina, sesida be orasum il baun e lura hai stuì ir enorm svelto: Jau hai sdrappà davent il plastic, stgarpà il netz, fatg giu la paletscha a l'emprima, durant mangiar ella hai jau fatg giu paletscha a la segunda ed en mesa minuta avev'jau mangià tuttas. En quel mument ch'jau stranglegl giuadent la davosa curran trais bestias cun eglis flammegiants e sgnaffas engurdas en dad isch. «Tgi ha mangià las manderinas?» sbragian las bestias cun sbava sin bucca. «Jau betg.»